

摘藻堂四庫全書薈要

集部

欽定四庫全書薈要卷一萬五千五百三十三

集部

劔南詩豪卷四十三

宋 陸游 撰

東園小飲

少年萬里走塵埃歸臥柴荆晝不開
十事真成九敗意一春知復幾銜杯
波清憑檻觀魚樂風緊鉤簾待燕回
催喚比隣同晚酌旋燒笙筍摘青梅

又

八東又見幾春風
茆屋蘆藩寂寞中
道業雖如詩不進
世緣已與夢俱空
高枝濯濯辛夷紫
密密深深躑躅紅
村巷斷無軒蓋到
一樽猶得伴鄰翁

又

三月園林日漸長
閒從鄰曲當年光
醑醑獨殿羣芳後
醺醺能令萬事忘
下豈尊羹誇舊俗
供鹽梅子喜初嘗
烏靴席帽知何樂
自古京塵眯眼黃

又

乞得殘骸老故山，草亭終日對孱顏。
孤雲百尺起江際，幽鳥數聲鳴竹間。
衆死一身今獨健，人忙萬物本常閒。
此心欲語知誰聽，賴有漁樵日往還。

病退頗思遠遊信筆有作

平日身如不繫舟，曾從楚尾客秦頭。
風生江浦千帆曉，月落山城一笛秋。
萬事只能催白髮，百年終是臥荒丘。
扶衰強項君休笑，尚憶人間汗漫遊。

春晚閒步門外

金
卷四十三
病退扶行力尚微悠然隨意出荆扉蜂貪釀蜜爭花去
燕喜分泥傍水飛午渴坼瓶嘗煮酒晴暄開筍換單衣
躊躇已久歸猶嬾更向溪頭坐釣磯

嘲布穀

時令過清明朝朝布穀鳴但令春促駕那為國催耕紅
紫花枝盡青黃麥穗成從今可無語傾耳舜弦聲

題齋壁

出郭無十里結廬纔數間每將窮博健不遣樂妨閒賣

藥雲邊市尋僧雨外山何妨搖擻去却作跨驢還

龜堂晚興

九日春陰一日晴回塘閤院愜幽情小魚出水圓紋見
輕燕穿簾折勢成今日掩關真佚老向來涉世亦遺名
巡簷更有欣然處新筍初抽四五莖

長干行

裙腰綠如草衫色石榴花十二學彈箏十三學琵琶寧
嫁與商人夫婦各天涯朝朝問水神夜夜夢三巴聘金

雖如山不願入侯家
鄣袖庭花下東風吹鬢斜

養生

受廬故里老為氓三十餘年學養生
倩盼作妖狐未慘肥甘藏毒醢
猶輕忠言何啻千金藥赤口能燒萬里城
陋巷藜羹心自樂傍觀虛說傲公卿

園中觀草木有感

木筆枝已空玉簪殊未花
頽桐時更晚春盡始萌芽
老人多感慨俯仰悲歲華
兩曜如犇輪疾去不可遮城頭

插雙旗疊鼓催清笳兀然一室間不復過隣家午睡或
至莫亂髮垂髭髻所嗟瘦僧死莫致茶山茶茶山僧道
有歲餉新
茶今死已
再歲矣

恩賜龜紫

憶昔青衫上赤墀
領間未有一莖絲
豈知晚拜金龜賜
却是霜髯雪鬢時

又

已挂朝衣神武門
暫紆紫綬拜君恩
兒孫賀罷還無事

雨笠煙蓑自灌園

自警

少年不自量妄意慕管葛晚節雖知難猶覲終一詒悲
哉老病馬解縱誰復秣既辭簪纓勞始愛原野闊飲澗
齧霜管亦可數年活勿復思長途嘶鳴望天末

獨夜

一生食太倉蠹耗均雀鼠雖云久置散飢飽尚撐拄兩
年失微祿始覺困羈旅傾身營薪米得食已過午人觀

不堪憂意氣終自許藜羹若大庖草廬如萬礎平生師
顏原本自藐晉楚悠然臥北窓殘燈翳還吐

雨夕枕上作

鬢毛日夜雪霜稠冉冉年光逝肯留酒力但資愁作崇
雨聲偏與睡為仇銘旌官職眼前事史冊姓名身後憂
畢竟此生何處是江湖萬里有孤舟

喜晴

澤國風雨多春盡尚裘褐閉門不能出飽受鳩婦咍今

朝雲忽歸溝水清活活偶為東園行魚鳥關何闊婦女
蠶事終桑柘光如潑布穀汝勿憂吾袴真可脫

觀運糧圖

王師北伐如宣王風馳電擊復土疆中軍歌舞入洛陽
前軍已渡河流黃馬聲蕭蕭陣堂堂直跨井陘登太行
壺漿簞食滿道傍芻粟豈復煩車箱不須絕漠追敗亡
亦勿分兵取河湟但令中夏歌時康千年萬年無餽糧
宇文袞臣吏部予在蜀日與之遊至厚契闊死生

二十年矣庚申三月忽夢相從如平生愴然有賦
英姿爽氣宇邛州雖古人中豈易求六月長途將暍死
一天風電起龍湫

阿姥

城南倒社下湖忙阿姥龍鍾七十強猶有塵埃嫁時鏡
東塗西抹不成粧

初夏

雨足移秧後風和剝繭初昏昏時就枕貿貿却尋書晚

步身須杖屨興髮廢梳滿城車馬客誰復問何如

讀書

稽古衰猶力翻書夜達晨
思人頻掩卷感事忽霑巾
世閒幾春夢身今一老民
忍窮端已慣蔬食又經旬

喜晴

江湖春莫多風雨點滴空堦實
厭聽剝喜今朝有奇事
一窻晴日寫黃庭

初夏北窻

作墨無聲紫玉池年光又入放翁詩風和柳岸吹綿後
雨足瓜畦引蔓時病酒相如無奈渴清言叔寶不勝羸
此生豈復功名事付與城頭畫角悲

又

水際柴荆晝不開臥聽微雨雜輕雷春蠶滿箔眠初起
社燕爭巢去復來海檜屈蟠依怪石山榴零落點蒼苔一
樽及此風光美車下長坡底用推

書適

老人去健羨飯足便有餘此外一壺酒薦以園中蔬手
種數畦花時開一編書近者苦足蹇復營一柴車時時
訪溪父亦或遊僧廬上下山澤間視身等禽魚既歸則
浩歌幽抱亦少攄一笑謂兒子不須起犁鋤

幽居初夏

路繚長隄北家居小市西陂塘晨飲犢門巷午鳴雞婦
喜蠶三幼鄉中謂蠶眠為幼兒誇雨一犁衰翁亦放浪未怕屐

露泥

又

梅塢青黃子草陂紅紫花雙鵝朝戲浦羣鴨莫還家赤
脚挑殘筍蒼頭摘晚茶出門逢野老滿意說桑麻

又

詰曲穿桑徑謳啞響竹門疏泉灌藜莧倚杖牧雞豚江
步橫新舶茅簷弄幼孫太平端有象誰與畫吾村

又

大耋光陰短南訛日月長松枯宜倒壑龜老慣搘牀寂

寂三升稷悠悠百本桑飢寒猶骯髒何術砭吾盲

獨醉

老伴死欲盡少年誰肯親自憐真長物何啻是陳人江
市魚初上村場酒亦醇頽然北窓下不覺墮紗巾

獨立

午醉初醒後回廊獨立時斜陽明雨葉乳鵲裊風枝違
俗雖堪笑師心頗自竒傍人疑徙倚向道是尋詩

高臥

省戶歸來不計年悠然高臥鏡湖邊
鉤簾每對千峰雨接竹新分一脉泉
學問誠身元有道阨窮知我豈非天
虛名自古能為累正恐人看直一錢

趙彥膚修撰挽辭

朝路英聲早宗盟宿望尊
讌談推醞藉大筆擅雄渾
許國心猶壯安邊策具存
悽涼故時客痛哭望秋原

讀香奩集詩戲效其體

金鋪一閉幾春風咫尺心知萬里同
麝枕何曾讓夢惡

玉壺空解貯啼紅畫愁延壽丹青誤賦欠相如筆墨工
一事目前差自慰月明還似未央中

野步至村舍莫歸

草徑盤紆入廢園漲餘野水有殘痕新蒲漫漫藏孤舸
茂樹陰陰失近村拄杖敲門求小憇老盆盛酒瀉微渾
興闌却覓橋邊路數點歸鷗已帶昏

述悲

屏居不出門終歲袖手坐但怪意氣衰那覺日月過故

人為冢丘老伴餘幾箇天高鬼神惡回天夷齊餓遺魂
一零落豈復聞楚些且當醉濁醪吾夢行亦破

江東韓漕晞道寄楊庭秀所贈詩來求同賦作此

寄之

三朝魏魏韓侍中爛然彛鼎書元功西戎北狄問安否
九州萬里涵春風子孫繼踵皆將相我猶及拜西樞公
顧憐通家略貴賤勞問教誨均兒童西樞有孫又奇偉
凜然太華摩蒼穹小試玉節江西東文書如海到手空

政成蒲鞭亦不用地上錢流倉粟紅君持此手上廊廟
折衝禦侮知從容桑乾不勞尺箠下榆關正可丸泥封
却歸故里訪遺老應記山陰九十翁

雨夜

麥熟家家喜墮涎龜堂依舊突無煙雨中更覺淒涼甚
一點殘燈守蠹編

小橋

漠漠輕陰隱隱雷石榴半落點莓苔小橋西北闌干角

獨岸綸巾待雨來

自笑

三間茅屋寄滄浪
烏出樊籠馬脫韁
濫濫陂塘秧水滿
陰陰門巷麥風涼
疏盤旋采溪毛滑
蓬艇新編露箬香
捐盡浮名方自喜
一生枉是伴人忙

入梅

微雨輕雲已入梅
石榴萱艸一時開
碑償宿諾淮僧去
卷錄新詩蜀使回
墨試小螺看斗硯
茶分細乳玩毫杯

客來莫誚兒嬉事九陌紅塵更可哀

雨夜

小雨收仍落孤燈翳復明
衰殘書易忘憂患夢多驚
熠燿矜暗翻翻雀轉更閉門
行老死亦足慰平生

燕

初見梁間牖戶新
街泥已復哺雛頻
只愁去遠歸來晚
不怕飛低打著人

午枕

茅簷一杯淡藜粥有底工夫希鼎餽書中至味人不知
雋永無窮勝梁肉老夫享此七十年每媿天公賦予偏
清泉洗鬴煎山茗滿榻松風清晝眠

項里觀楊梅

山前五月楊梅市溪上千年項羽祠小繖輕輿不辭遠
年年來及貢梅時

鄉俗謂楊梅止曰梅

又

隔歲租園不計錢楊梅海裏過年年癡人只競問名利

那信三山是地仙

又

溪流曲曲樹陰陰
人語煙中覺塢深
把定山僧同一笑
明年強健更相尋

又

山中戶戶作梅忙
火齊驪珠入帝鄉
細織筠籠相映發

華清虛說荔枝筐

鄉俗謂選擇楊梅為作梅

夜歸

城角傳三弄桑村喜獨歸雨多螢滿野徑狹露沾衣食
儉鹽醯薄年衰氣力微青燈對兒女撫事一歔歔

五月十一日睡起

病眼慵於世事開虛堂高臥謝氛埃簾櫳無影覺雲起
草樹有聲知雨來茶椀嫩湯初得乳香篝微火未成灰
脩然自適君知否一枕清風又遇梅

示客

世間可笑走跋跋誤認虛空作汝身已覓微名潤枯骨

更謀厚積遺何人風穰畢竟非心境瓦礫何妨是道真
新藕出泥瓜上市為君一醉墮紗巾

雨中作

雨聲一滴不肯住客夢欲成還自驚白水陂邊破茅屋
亂書堆裏老儒生出行豈復有流輩未死尚能躬釣耕
十日無魚亦何歎新菰幸可配吳杭

旬日來溪水泛
溢魚不可得

舟中遣興

湖海渺雲濤浮家得養高方牀展蘄簟短褐束鄙僚酒

裏亦何好人間聊可逃
酣歌施樓底萬事一秋豪

自嘲

少讀詩書陋漢唐
算年身世寄農桑
騎驢兩腳欲到地
愛酒一樽常在傍
老去形容雖變改
醉來意氣尚軒昂
太行王屋何由動
堪笑愚公不自量

齋中雜興十首以丈夫貴壯健
慘戚非朱顏為韻
成童入鄉校
諸老席函丈
堂堂韓有功
英槩今可想
從父有彥遠
早以直自養
始終臨川學
力守非有黨
紛紛

名佗師有泚在其類二公生氣存千載可畏仰

又

士生學六經是為聖人徒處當師顏原出當致唐虞斯
文陣堂堂臨敵獨援枹異端滿天下一掃可使無乃知
立事功先要定規模彼雖力移山安能奪匹夫

又

公議在天下如人有元氣平居失護養一旦可勝諱神
丹卒難求百疾起如蝟奄奄息僅屬熟視吁可畏大義

在春秋遺跡悲漢魏君看徐孺子底物視富貴

又

昔我自蜀歸耆舊已凋喪後來二三公尚慰天下望千
里一紙書慇懃問亡恙嗚呼亦已矣遺語寄悲愴我亦
迫桑榆便恐無輩行夜窓對青燈力憊心尚壯

又

餘齡垂八十雖憊猶強飯正如老病馬風沙時一噴玉
關眇何許道里何啻萬目中埃歷歷欲進不能寸矯首

望秋空徒羨霜鵲健
葬骨亦何悲
吾非麒麟楨

又

琅琅誦詩書
尚記兩髦髦
誰料七十年
沉滯終坎窞
炊突映茅廬
日暮煙慘慘
恐窮端已熟
撫事空自感
狂言悔噬臍
衆皆驚破膽
尚有愛書心
還如嗜菖歎

又

去國已酉冬
忽見十頌歷
衰殘口兩齒
困阨家四壁
時看溪雲生
飽聽簷雨滴
悠然度寒暑
何處著欣戚
幽人

豈知我月夕聞吹笛何當五百歲相與摩銅狄

湖中風月佳時

每聞笛聲異甚莫知何人意其隱君子也

又

扁舟東下破日月去若飛當時筆硯舊久已晨星稀俊逸如伯渾簡詣如知幾天高鬼神惡回首萬事非我欲泝黃牛買屋居青衣九原不可作哀哉誰與歸

又

荷鉏草堂東藝花二百株春風一朝來白白兼朱朱南

列紅薇屏北界綠芋區偃蹇雙松老森聳萬竹矍餘地
不忍第挿援引瓠壺何當拂東絹畫作山園圖

又

閑居寂無客柴門晝常關孤舟小於葉放浪煙水間樹
暗楊梅村露下白蓮灣釣魚樵風涇買酒石帆山向來
支許輩恐亦無此閑道逢若耶叟握手開蒼顏

夏五月方閑雨忽大風雨三日未止

海風一夕狂拔木山雨三朝猛穿屋向來望雲眼欲枯

雨甚還憂敗嘉穀今年旱勢連吳中吾州乃獨勞神龍
稽首龍公要斟酌收雲歸山水歸壑

又

五月晝晦天欲雨街中人面不相覩風聲撼山翻怒濤
雨點飛空射强弩一雨三日姑可休龍其玩珠歸故湫
千里連雲慶多稼牲肥酒香作秋社

遣興

外物元知等一塵浮生何事最關身江山好處得新句

風月佳時逢故人有酒一樽聊自適
藏書萬卷未為貧
聖賢自古無知命君看居東與在陳

又

老向人間怯路岐感今懷昔不勝悲
詩無傑思知才盡
酒有殘杯覺氣衰
縣郭燈疎尋店夜
津亭雨細待船時
筋骸尚給春耕在
便買烏犍亦未遲

六月一日曉賦

視夜明星高蟬聲滿庭
樹殘骸幸差健
散髮穿兩屨
巖

扉手自開曳杖得徐步
碧瓦浮青煙圍荷瀉殘露
草木無俗姿雞犬共幽趣
兒來問晨炊一笑揮使去

露坐

泠泠野水赴橫塘坐久松風入
髮涼月淡星疎天欲曉
未妨清嘯倚胡牀

夜賦

月暈知將雨風聲報近秋
暗廊行熠燿深樹嘯鵲鷗
老韋傳家事狂猶為國憂
相齊雖已矣且復飯吾牛

乙夜納涼

幽人新製葛衣成
二寸藤冠覺髮輕
淨掃中庭延月色
緩拖拄杖聽蟬聲
微涼便欲踈紈扇
小醉何妨倒玉罍
八尺風漪真美睡
故應高枕到窓明

五鼓

夢斷華胥夜艾時
遶廊蕭散曳筇枝
長空漸見明河落
短調猶殘畫角吹
世事又隨朝日出
釣船莫負早秋期
南湖五畝新菰熟
此味惟應老子知

老態

齒如強留客雖住無久理目如新募兵臨敵烏可使齒
廢踈梁肉目澀屏書史浮世真幾何老態遽如此啜粥
習安坐用短亦自喜作詩記吾衰聊用調穉子

枕上聞風鈴

毒暑今年倍故常蟲聲四合欲舁牀老人不辦搖團扇
靜聽風鈴意已涼

又

流汗沾衣熱不勝
饒蚊乘勢更縱橫
夢回忽覺南風起
時聽錚然一兩聲

寄贈湖中隱者

高標絕世不容親
識面無由況卜鄰
萬頃煙波鷗境界
九秋風露鶴精神
子推綿上終身隱
叔度顏回一輩人
無地得申牀下拜
夜聞吹笛度煙津

觀畫山水

古北安西志未酬
人間隨處送悠悠
騎驢白帝城邊雨

挂席黃陵廟外秋
大網截江魚可膾
高樓臨路酒如油
老來無復當年快
聊對丹青作臥遊

六月十八日立秋未旦起行山園口占

北斗離離柄漸西
披衣出戶聽晨雞
豈惟蒲柳先搖落
坐覺風雲已慘淒
斷簡不妨重料理
清樽隨處可提携
穿林莫惜衣霑露
爽徹靈臺勝寶犀

新秋

衰髮成絲奈若何
更堪日月疾飛梭
梧桐敗葉飄猶少

蟋蟀雕籠賣已多，歲樂喧呼沽酒市。
夜涼悽斷采菱歌，老夫亦動秋風興。
欲倩隣翁買釣蓑。

晨起自山園歸書室

世事苦紛紛，村墟寂不聞。
穿林拾蟬蛻，隔浦數鷗羣。
搖落初飄葉，高春未散雲。
歸來書滿眼，猶足肆吾勤。

初秋小雨

雨來一洗肺肝熱，風過遠吹禾黍香。
誰識山翁歡喜處，短檠燈火夜初長。

出遊

舉世誰能伴我閒
出遊隨處一開顏
繫船扛鼎將軍廟
秣蹇流觴內史山
小市況經搖落後
高城回望莽蒼間
歸來燈火湖塘晚
指點柴門未上關

對酒

平生但信緣作計
每不審春炊官倉粟
一飽輒甘寢二年
棄微祿溝壑方慄慄
藜羹闕鹽酪豆飯雜沙塤
偶然餓不死得酒猶痛飲
捩回灩澦施喚省邯鄲枕

自勉

曩歲讀隱書妄意慕陶葛芝房及乳石日夜躬采掇飛
舉固未能死籍或可脫那知事大謬髮齒將禿豁神仙
豈棄汝正坐自迂闊餘年尚努力勿待燭見跋

新涼

初卷含風八尺漪井桐已復不禁吹蟬聲未用催殘日
最愛新涼滿袖時

醉中題民家壁

壯歲羈遊厭故棲，算年却愛草堂低。
交情最向貧中見，世事常於醉後齊。
松吹颼颼涼短髮，芒屨策策響新泥。
吾詩戲用寒山例，小市人家到處題。

秋景

雨泣蘋花老，風搖稗穗長。
昏林喧宿鳥，秋院咽啼螿。
舊學成迂闊，初心墮渺茫。
頽齡尚餘幾，誰與問蒼蒼。

舟中作

會稽城上角鳴鳴，日落煙村暝欲無。
千載虛名笑張翰。

一官元不直尊鱸

雜興

足弱僅能行齒搖常欲墮扶持賴藥物苟幸一日過事
來強訓畬其實惟欲臥平生許文休歲晚依馬磨

又

蘭臺遺漆書汲冢收竹簡辛勤萬卷讀不負百年眼圍
座浩縱橫插架高巉巖一笑顧吾兒銀艾何足綰

又

壽年本偶爾亦與富貴同一日復一日遂作八十翁几
杖稱大耋貂蟬號三公信手忽成盧孰為拙與工

又

少年豈知酒借醉以作狂中年狂已歇始覺酒味長湛
湛癭樽綠酌以紅螺觴醒醉不可名兀坐萬事忘

自詠閒適

殘年鄰曲幸相依真似遠天老鶴歸荷浦未疎魚正美
鄉俗謂夏秋魚為荷葉下魚豆畦欲暗雉初肥款門路近時看竹送

酒人多不典衣最喜夕陽閒望處數家垣屋鎖煙霏

近村算歸

莫笑山翁雪鬢繁歸休幸出上恩寬蠶樽恰受三升醞

龜屋新裁二寸冠

蠶樽即皮襲美所云訶陵樽也
予近以龜殼作冠高二寸許

僧閣

鶯茶同淡話漁舟投釣卜清歡還家欲作諸孫贈村路

累累柿未丹

秋興

扶衰又見素秋過未死其如造物何破屋頽垣那敢議

濁醪麤飯已為多佩刀但可償黃犢作字安能博白鵝
龜紫拜恩如夢寐殘年其實一漁蓑

讀史有感

不肯低頭就世事亦不作牋與天公惟須痛飲以醉死
亂山深處聽松風

又

昔人識不過十字富貴封侯渠自如龜堂閉門萬卷讀
一字不肯供時須

又


蘇門長嘯不可親
鹿門采藥更絕塵
老死故山雖自許
掩書未免媿斯人

劔南詩豪卷四十三

謹案卷四十二第十三頁前一行惜哉風雨餘刊

本惜訛借今改





總校官庶吉士臣張能照
校對官庶吉士臣翟槐

謄錄貢生臣王嘉稷

欽定四庫全書薈要

集部

劍南詩藁卷四十四

五

詳校官助教臣謝登雋



欽定四庫全書薈要卷一萬五千五百三十四

集部

劔南詩豪卷四十四

宋 陸游 撰

讀何斯舉黃州秋居雜詠次其韻

讀三
讀非所長一帶每嬾束揖客雖小殊亦未勝僕僕正

須駕柴車歸藝東籬菊故山甘水泉羣飲友麋鹿百年
不堪玩萬事要自燭小人欺屋漏吾輩當戒獨

又

少從長者遊麤聞聖人道日食雖一簞頗覺顏色好辛
勤五十年猶秉後凋操風俗日已移令人惡懷抱紛紛
堪一咍驕我以旗纛豈知江湖間世襲散人號

又

全家寄舴艋結茅非始謀江市得煙蓑不博千金裘道
散俗日薄老聃出哀周治身去健美如稼必去蠹吾身
一隙塵斯世一客郵君能通其說生死真浮休

又

衆星麗長空惟月最為傑
我大圓鏡粲粲白玉玦
穿林散珠璣八戶凜霜雪
世方喜繁華我獨慘不悅
清光真可友肝肺冰欲結
彼哉市朝人忿慾生內熱

又

夜靜我欲歌四座且勿喧
堯舜本得道富貴何足捐
聖人久不作學者墮語言
著書各專門百家散如煙
一身有不知況察魚與鳶
安得天下士相與明忘筌

又

古人處丘園如彼不嫁女終身秉大節敢恨老環堵嗟
予晚乃覺乞骸歸卒伍去就講已熟穴居宜知雨百尺
持汲綆道長畏天暑先見雖有慙愛身亦自許

又

賦性本剛褊直欲棲溪山晚乃稍悔悟自恨不少寬胡
越本一家禍福環無端少忍萬事畢孰為熱與寒我友
為我言冠蓋滿長安人人不如君八十猶朱顏

又

倚牆有鉏耰當戶有杼軸雖云生產薄桑麻亦滿目況
承先人教藏書令汝讀求仁固不遠所要念念熟喟然
語兒子勿媿藜藿腹亦勿慕虛名守此不啻足

又

人生天壤間出處本異趣釋耒入市朝徒失邯鄲步昔
人亦有言刻足以適屨奈何不自反忽已迫霜露我躬
尚不閱況為子孫慮歲晚故山寒地爐可煨芋

又

少年去國時不忍輕出晝晚歸補省郎但覺慙列宿人
豈不自揣幸矣老雲岫知止詎敢希要且避嘲詬誰將
有限身遺臭古今宙人誅雖或逃陰陽將汝寇

讀蘇叔黨汝州北山雜詩次其韻

暑耘日炙背寒耕泥沒脚衆人占膏腴我獨治磽确力
盡功未見厥土但如昨豈惟窘糠粃直恐轉溝壑今年
雨暘時天如相耕穫屋傾未暇扶且復補籬落

又

舊絮補破襦生薪續微火惇孤有凍死自視亦已過隣
翁冒風雪斗酒持飲我尖團擘霜蟹丹漆釘山果欣然
共笑語何止寬寒餓布被擁更闌招魂不須些

又

三山鏡湖上出郭無十里結廬非所擇但取便薪水間
亦出從官安能慕園綺地主卜林塘亦復異子美蘧蒢
方丈室僅足容卧起吾意本扁舟陸居聊爾耳

又

祠官粟一囊不贍軀七尺前年蒙寬恩例許乞骸骨
聯翩三兒子俱作鸛雀碧賦祿雖尚遠亦足慰衰白
幅巾節簷下稱病謝來客從今門前路永掃車馬迹

又

舍北有漁磯下臨清溪流柳陰出朱橋蓮浦橫蘭舟
蓊絲二三畝采掇拱晨羞魚蝦雖瑣細亦足贍吾州
人生常如此安用萬戶侯綠蓑韋可買金印非所求

又

寓形百年中如臂屈伸頃少壯幾何時已復墮衰境
人喜自潔臨澗漱綠淨佛龕香事已僧鉢供煮麤山茶
試芳嫩野果薦甘冷不學萬錢厨長魚取淮頴

又

巖石著幼與風月思玄度老子放浪心常恐迫遲暮安
得世外人握手相與語吾宗甫里公奇辭賦漁具高風
邈不嗣徒有吟諷苦霜風吹短衣何山不堪住

又

久病臥江村髮白面黧黑艱難念溫飽日夜積涓滴聚
壤糞園桑荷鋤耘壠麥苟失一日勤農事深可惜小兒
念乃翁卒歲共欣戚跂望明年春社雨泥一尺

又

德孫秀眉宇慨然修初服枯腸貯詩書十飯九不肉成
童將覓舉想見袍立鵠先澤儻未衰豈無五秉粟汝能
記吾言併以告阿福閉門勿雜交一經萬事足

又

吾幼從父師所患經不明何嘗效侯喜欲取能詩聲亦
豈劉隨州五字矜長城秋雨短檠夜掉頭費經營區區
宇宙間捨重取所輕此身儻未死仁義尚力行

新治火閣

老子今朝喜有餘房櫳新畢得安居爐紅氍暖不出戶
木落窓明常讀書浮蟻撇嘗人散後蹲鴟煨熟雪飛初
頽然自適還終日殊勝隆中臥草廬

枕上作

無地容錐四壁空浩然亦未愴途窮夢回倦枕燈殘後
詩在空堦雨滴中徂歲易成雙鬢禿故人難復一樽同
唐安萬里音塵絕誰為寒沙問斷鴻

張季長今年
尚未通書

又

蕭蕭白髮臥扁舟死盡中朝舊輩流萬里關河孤枕夢
五更風雨四山秋鄭虔自笑窮耽酒李廣何妨老不侯
猶有少年風味在吳牋著句寫清愁

初睡起有作

喔喔曉雞鳴
迢迢殘漏聲
撥衾幽夢斷
褰幌小窓明
獠婢篝衣暖
山童擁篲行
老夫徐下榻
負火聽鉶笙

示友

道向虛中得
文從實處工
凌空一鶚上
赴海百川東
氣骨真當勉
規模不必同
人生易衰老
君等勿怱怱

述懷

宦遊輕用不貲身
歛退今為省事人
唾侯面乾元不校

美憂手爛更誰嗔
時分隣瓮雙瓶綠

見張右史詩

永謝官倉

五斗陳最好莫秋溪上路柴門月色向人新

枕上

殘燈熠熠露螢明落葉蕭蕭寒雨聲堪笑衰翁睡眠少
小詩常向此時成

又

斷香猶在夢初回燈似孤螢闔復開怪底詩情清徹骨
數聲新鴈枕邊來

病足久敗遊山之興山中道人多見問戲作示之

病侵腰股作蹒跚九折途生布武間東姥自無緣見佛
北公那有力移山買來芒屨真虛費扶上籃輿亦漸艱
賴有春陵數峰在虛窓高卧看孱顏

舟中作

三百里湖新月時放翁艇子出尋詩城頭蜃閣煙將合
波面虹橋柳未衰漁唱蒼茫連禹穴寒潮蕭瑟過娥祠
祖龍虛負求僊意身到蓬萊却不知

追懷胡基仲

墓在雲門顯聖寺後

高潔胡徵士當時已絕無門庭謝殘客薪水斥常奴遺
橐何由見英魂不可呼誰憐墓上草又是一年枯

十月八日九日連夕雷雨

雨聲聒耳不停點雲氣冒山殊未開敢恨終年惟短褐
但驚十月有奔雷牽蘿且復補茆屋飯豆何妨羹芋魁
莫笑賦詩無傑句年來萬事學低摧

西村

今年四月天初暑買蓑曾向西村去桑麻滿野陂水深

遙望人家不知路再來桑落陂無水閉門但見炊煙起
疑是義黃上古民又恐種桃來避秦

感事示兒孫

人生讀書本餘事惟要閉門修孝悌畜豚種菜養父兄
此風乃可傳百世我聞長安官道傷至今人指魏公莊
北方俗厚終可憐一字不識勤耕桑

長安有魏鄭公塢莊喬孫皆力耕無

識字者張芸
史嘗過之

或遺木瓜有雙實者香甚戲作

宣城繡瓜有奇香偶得並蒂置枕傍六根互用亦何常
我以鼻嗅代舌嘗

十月

十月霜侵季子裘吾詩又送一年秋風回斷續聞樵唱
木落參差見寺樓久已浮雲看富貴固應華屋等山丘
江邊海際多幽致擬跨青驄處處遊

初晴

袖手東窓初日明殘編未負老書生不勝多病畏寒雨

正得一霜方快晴客戶餉羹提赤鯉

莊戶以雞魚之屬來餉謂之送羹

隣家借碓擣新杭柴荆莫怪無車馬恰要無人識姓名

梅花

造物作梅花毫髮無遺恨楚人稱芳蘭細看終不近

又

五年作竹梢十年作梅枝九泉子廉子此語今誰知

宣廉

仲自言以五年之功作竹梢十年之功作梅枝

又

欲與梅為友常憂不稱渠從今斷火食飲水讀僊書

又

春信今年早江頭昨夜寒已教清徹骨更向月中看

又

江上梅花吐山頭霜月明摩挲古藤杖三友可同盟

對酒戲詠

淺傾西國蒲萄酒小嚼南州豆蔻花更拂烏絲寫新句
此翁可惜老天涯

冬夜

北斗挂屋角西風驚雁羣
山寒歲云暮人靜夜中分
酒滴槽牀雨香生紙帳雲
眼花書課減舊學失耒耘

冬晴稍理舊學有感于懷

天公元不吝光陰付與書生
遂本心老已為民猶學問
向雖作吏半山林百年斷豪
傳三世一日晴窓抵萬金
努力更思恢道術酒杯雖把
不須深

葺小圃及東齋

山翁作園沼安樂及禽魚凡草猶當養芳蘭可得耰初
非治一室亦豈愛吾廬莫境雖云迫心期故有餘

讀經示兒子

通經本訓詁講字極聲形未盡寸心苦已銷雙鬢青懼
如臨戰陣敬若在朝廷此是吾家事兒曹要細聽

出遊不果

天柱峰前水亂流石碁渡口葉飛秋青嶽已是前身事
縱有籃輿亦嬾遊

夢行秦晉間有作

夜店紬衾暖晨厨粟飯香
驢肩雙酒榼童背一琴囊
冰坼河聲壯郊平塙影長
古今均夢境不用弔興亡

聞雞鳴自警

為善孳孳進德新雞鳴
每念舜何人此身強健直須勉
一日會當無此身

嘲子聿

講誦多吳語鉤提學佐書
夜分燈未徹晨起髮慵梳
飽

食園官菜少留溪友魚能憐乃翁病身自舉籃輿

馬上口占

大耋光陰豈自期即今堪喜亦堪悲關河隔絕初心負
憂患侵尋舊學衰羸馬涉溪孤店路栖鷄滿樹曉霜時
憑鞍殘夢悠然覺又得浮生一首詩

幽居

莫笑茅茨陋岡形接臥龍連娟鏡湖月縹渺寶林鍾
約魚池釣眠聽碓舂他年好事客過此訪遺蹤

感事

陋巷何須歎一瓢朱門能守亦寥寥衲衣先世曾調鼎
野褐家聲本珥貂若悟死生均露電未應富貴勝漁樵
十年回首俱陳迹不向杯中何處消

沈義倫丞相裔孫為僧劉仁瞻侍中裔孫

為道人皆孤身死紹興中二公之後遂絕

初寒

逐祿天涯半此生明時寬大許歸耕山圍魚市寒無色
雨掠蓬窻夜有聲白髮青燈身潦倒殘蕪落葉歲崢嶸

爾來有喜君知否買得烏犍萬事輕

寄題李長飾菴

近詔還中祕新文記飾菴主盟君勿讓賈勇我何堪木
落山容瘦雲齊雪意酣何由共杯酒把蟹擘黃甘

對食書媿

連年寬水旱天若相懸車羸有芋魁豆併忘熊掌魚先
生飯不足賢者食無餘老我知何幸晨盤厭羹蔬

戲題酒家壁

漫道江南倚寺樓，豈知煙雨弄扁舟。
并刀不剪清愁斷，楚練難縻白日留。
湖上采菰甘似蜜，街頭買酒滑如油。
金丹九轉何時畢，且對梅花一醉休。

又

送了春歸又送秋，人間隨處寄悠悠。
百年此際成遺老，萬里當時賦遠遊。
筆力日衰慙陣馬，江天歲晚狎冥鷗。
清狂自笑無時歇，又犯新寒上市樓。

又

朋舊存亡寂不聞年年江海愴離羣時平酒價賤如水
病起老身閒似雲飽食每慙荒舊學後生誰可付斯文
案頭清鏡塵昏盡殘髮知添白幾分

予老甚髮乃有未白者

十月二十八日夜風雨大作

風怒欲拔木雨暴欲掀屋風聲翻海濤雨點墮車軸柱
門那敢開吹火不得燭豈惟漲溝谿勢已卷平陸辛勤
執宿麥所望明年熟一飽正自難五窮故相逐南隣更
可念布被冬未贖明朝甌復空母子相持哭

夜寒燃火有感

墮巢拾槁枝微火吹孤螢風火一相得須臾細煙青暖
焰遂騰上凜冽回玄冥君看金鼎火其初亦熒熒至理
存橐籥奇功挾風霆笑談縛三彭指顧役六丁超然出塵
世豈獨制頽齡勸君勿虛死萬過誦黃庭

農事休小葺東園十韻

歸老心常逸新寒體亦康幸當農事隙稍治舊園荒剪
闢西山出縈回北徑長作欄扶弱蔓換土植孤芳霜霰

簞簞碧風煙薜荔蒼蝶來翻小翅鳥下轉幽吭疏剔巖
泉集耘鋤藥草香溪藤裁酒榼番錦製詩囊坐久雲生
石歸遲月滿廊人間胡不樂拔宅笑君房

開東園路北至山脚因治路傍隙地雜植花草
清溝東畔翦菴管雖設柴門盡日闌遠引寒泉成碧沼
稍通密竹露青山幽花泣露開仍落好鳥穿林去復還
更上橫岡吾所愛小兒試覓屋三間

又

魏野林逋久已僊
放翁寄傲鏡湖邊
松根偃蹇支琴石
巖竇潺湲洗藥泉
半祿掃空雖在我
殘年健甚豈非天
遙遙桑苧家風在
重補茶經又一編

又

憶自南昌返故鄉
移家來就鏡湖涼
鶴雛養得冲霄漢
松樹看成任棟梁
手版永拋貧亦樂
肩輿時上老何妨
平郊東望江城近
隱隱清笳送夕陽

又

父子追隨一笑傾東園東畔路初成夾栽芳草如繩直
前出籬門似砥平春近野梅香欲動雨餘溝水細無聲
今朝有意誰能識不用人扶亦自行

又

病眼逢人每嬾開正須此地洗氛埃數枝梅向林稍出
一脉泉從嶺背來藤杖有時緣石磴風爐隨處置茶杯
殘軀自笑如春草又喜天邊斗柄回

又

避俗從來恨不深
家園栽種偶成陰
西連幾曲菖蒲澗
東接無窮簷蔔林
烏柏谷寒迎野步
金沙泉冷洗塵襟
清音可寫吾詩拙
宅日君來試抱琴

連日治圃至山亭又作五字

薙圃課僮奴
爭前不待呼
水泉經雨壯
蓁莽得霜枯
高樹鳴雙鵲
清池下兩鳬
莫年性樂此
餘念一毫無

又

富貴尋常事
天奚獨汝慳
十分教嬾拙
百倍與清閒
放

鶴雲千頃釣魚溪一灣此時雖信筆它日不須刪

又

好竹千竿翠新泉一勺冰殘蕪襯落日老木上寒藤細
磴歌難過危欄曲可憑歸時忽已暮點點數漁燈

又

門開度略約路盡上坡陀農隙閒耕犢樵歸起醉歌青
煙舞鸞鳳白石伏龜鼉剝有筇枝興窮冬氣已和

寒夜

敗屋頽垣對短檠課書聊自限三更蕭條草木寒無色
寒窳狐狸出有聲半榼濁醪求火暖一篇疑義與兒評
未須遽起窮愁歎明日尋梅雪正晴

掩卷有感

少年雖讀書每恨性疎嬾中年頗自勵已歎歲月短學
不到聖賢此意終未滿甌空不憂飢衣垢不思浣區區
管晏事端可付一莞羸然八十翁風雪臥空館

閒遊

出雜羊牛牧歸隨鳥雀栖聊持數匙飯就乞半盂齋浩
蕩凌原野崎嶇歷澗溪閑遊豈不好客意自淒淒

野寺

閑行入野寺僧飯鼓其鏜慘慘風勢面暉暉日滿廊去
來元自在賓主兩相忘却下山坡路樵歌出隴長

三江

三江郡東北古戍鬱嵯峨漁子舩浮葉更人鼓應鼉年
豐坊酒賤盜息海商多老我無豪思悠然寄醉歌

讀老子

放翁晨興坐龜堂古銅匱燒海南香臨目接手精思林
身如槁木心如牆八十一章獨置傍徐起開讀聲琅琅
恍然親見古伯陽袂屬關尹肩庚桑孰能試之出毫芒
末俗可復躋羲黃陰符偽書實荒唐稚川金丹空有方
人生忽如瓦上霜勿恃強健輕年光

新泉

掃石陰雙松岸巾穿萬竹爾來又一竒巖泉寒可掬
料

泉可淪茗就泉可洗藥楚人曾未知但謂纓可濯

風雨

七十年來樂太平白頭父子事春耕因思世事悲身事
更聽風聲雜雨聲四海故人強半死一襟清淚對誰傾
新春要覓燒丹處不住青城住赤城

題菴壁

萬壘青山繞鏡湖數椽自愛野人居風來松度龍吟曲
雨過庭餘鳥迹書小疾不妨尋酒去豐年偶及挂冠初

有金可散還多事四壁蕭然計未疎

又

衰髮蕭疎雪滿巾君恩乞與自由身身并猿鶴為三友
一作家託煙波作四隣十日風號未成雪一年梅發又
催春漁舟底用勤相覓本避浮名不避人

讀僊書

與世已如風馬牛松風終日聽颼颼一爐丹熟定不死
半甌酒香安得愁腰帶羸前秋萬頃香爐峰下水交流

人間事事皆須命惟有神仙可自求

讀淵明詩

淵明甫六十遽覺前途迤作詩頗感槩自謂當去客吾
年久過此霜雪紛滿幘豈惟僕整駕已迫牛負輶奈何
不少警玩此白駒隙傾身事詩酒廢日弄泉石梅花何
預汝一笑從渠索顧以有限身兒戲作無益一牀寬有
餘虛室自生白要當棄百事言從老聃役

寒夜枕上

屋老霜寒睡不成
迢迢漏鼓過三更
烏啼林外月初上
犬吠水邊船夜行
市有歌呼知歲樂
亭無枹鼓喜時平
吾詩欲寫還慵起
卧看殘燈翳復明

新晴出門閒步

一夜風號作快晴
披裘扶杖出門行
青山繞舍雪封盡
丹葉滿街霜染成
廢寺僧寒多晏起
近村農惰闕冬耕
窮人旋畫膨脝計
自買蹲鴟煮糝羹

聞笛

雪飛數片又成晴透瓦清霜伴月明一曲忽聞高士笛
臨窓和以讀書聲

鳴禽

小徑霜泥結凍時幽人十日廢筇枝新晴池館春來早
簾外鳴禽聖得知

食晚

日高得米喚兒舂苦雨園蔬久闕供省事家風君看取
半飢半飽過殘冬

午坐戲詠

貯藥葫蘆二寸黃煎茶橄欖一甌香
午窗坐穩摩癢腹
始覺龜堂白日長

戲詠鄉里食物示隣曲

山陰古稱小蓬萊青山萬疊環樓臺
不惟人物富名勝
所至地產皆奇瑰茗芽落磴壓北苑
藥苗入饌逾天台
明珠百斛載芡實火齊千擔裝楊梅
湘湖蓴長涎正滑
秦望蕨生拳未開箭萌蟄藏待時雨
桑葦茵蟲驚春雷

撥花蒸煮蘸醃醬薑茁披剝醃糟醅細研甕粟具湯液
溼畧山嶺供炮煨老饒自覺筆力短得一忘十真堪咍
從今置之勿復道一瓢陋巷師顏回

歲暮貧甚戲作

得米還求澗底薪始知天地有窮人年開八秩寧賒死
官及三兒不救貧藥盡無如醫偃蹇囊空那辦酒逡巡
柳條萱草添愁思不似尋常見早春

汪叔潛教授挽辭

江南有奇士英譽早飛騰未見心先契相從氣倍增時
煩問字酒屢共讀書燈下榻延徐孺同舟得李膺百年
期永好一旦失良朋稚子初何取龍門亦許登流光疾
於鳥舊社冷如冰欲作千言詠哀遲愧未能

汪給事太夫人程氏挽辭

夫人內外二族享壽八九十者至二十餘人

爵色恩榮盛鄉閭譽望尊儒科傳累葉上壽萃高門阡
茂新栽柏堂餘舊樹萱故民何以報沾灑望秋原

太恭人諭氏挽辭

恭人生於紹聖二年沒於慶元六年壽九十六自太儒人至太

恭人皆
特恩封

耄齒人誰及高門世共榮
始終膺備福穉老遇昇平
綸綍褒嘉事鄉閭惻愴情
吾詩儻傳世亦足見平生

路乾

日曬霜融步步泥
旬餘不到石泉西
連朝和暖得乾路
喚取鄰翁來仗藜

寒夜

閉戶歲云暮
翻書夜向闌
足僵知火盡
目鈍覺燈殘
躍

浦魚驚獺穿林犬逐獮三年納微祿無媿得心安

乍晴至園中

藥笈漁竿每自隨
枯筇短帽恰相宜
投林但有窮猿喜
伏檻元無老驥悲
巖溜甘寒通碧沼
野梅清絕隔疎籬
放翁老甚情懷嬾
那辨題詩寄所思

欽定四庫全書



劔南詩豪
卷四十四

劔南詩豪卷四十四

欽定四庫全書薈要卷一萬五千五百三十五

集部

劍南詩藁卷四十五

宋 陸游 撰

十二月三日夜橋上看月

常時新月有無間
今夕清暉抵半環
柳外橋高最堪望
憑欄目送下西山

流年

流年及耄敢前期
浮世如漚只自知
多貯閒愁持抵酒

剡遊好景擬供詩海東藥到寬衰疾岷下書稀愴別離
陳明州餉人參張
季長久不得書約束春盤莫草草又當梅發兩京時

山家

風月寬閒地溪山隱遯身雲邊安井臼竹裏過比隣洗
木分巖瀑烹芝束澗薪柴門敲不應疑是避秦人

又

種藥為生業彈琴悅性靈中宵煮白石平旦誦黃庭茶
熟眠初起兒扶酒半醒意行無定處猿鳥共忘形

又

長生固非道得道自長生書不傳闕尹言誰契廣成羅
浮觀日出句曲聽松聲聞說長安好何妨醉太平

又

陶葛金丹訣千年祕不傳人皆肖天地世豈乏神仙擾
擾生趨死悠悠食復眠微言誰復領浩歎撫遺編

又

清絕更誰如松風小閣虛縵巾參几杖鶴毳落琴書新

鑿淘丹井常攜斲藥鉏身閒隨處樂何況是吾廬

小舟白竹篷蓋保長所樂也偶借至近村戲作

茅簷細雨溼炊煙江路清寒欲雪天不受相公金絡馬
羨他亭長白篷船

又

雪雲無際暗長空小市孤村禹廟東一段荒寒端可畫
白篷籠底白頭翁

稻飯

買得烏犍遇歲穰此身永免屬官倉塘南塘北九千頃

八月村村稻飯香

鏡湖下至海凡
種稻九千頃

殘臘

殘臘無多寒漸薄新春已近日微長棊枰散後軒窓靜
梅塢歸來襟袖香海霧籠山青淡淡河堤瀦水白茫茫
鷺飛前導生遊興笑岸綸巾上野航

又

殘臘去春纔十日衰翁告老已三年乳糜但喜分香鉢

銀勝那思映綵鞭萬里當時嗟漫浪一窻此日困沉綿
清泉白石無人到且結梅花淡淡緣

書志

著書汗馬牛不如守道力賣文取卿相詎是儒者職孔
光豈不學千載汙簡冊通塞本細事于我奚失得袁安
卧空廬亦度風雪夕如何慕溫飽撓節不自惜我突無
炊煙或至日中晷小兒抱遺經衣短兩脰赤吟誦何琅
琅聲如出金石掩卷語乃翁聖有陳蔡厄

數日不出門偶賦

衰甚身如作繭蠶經旬不省出茅菴老僧遣信分茶串
隱士敲門致酒甌看鶴松陰賞高潔疏泉石罅得清甘
地偏心遠無車馬賴有吾兒與劇談

又

十二年來一日同飯蔬略似誦經翁居家不擬依隣富
報國惟思祝歲豐米澗乍通寒溜碧蘭叢新放露芽紅
閨門萬化俱觀盡那用瞿曇更說空

又

湖上蝸廬僅自容，寸懷無奈百憂攻。
補衣未竟迫秋露，待飯不來聞午鍾。
稚子挾書勤質問，隣翁釋耒問過從。
今朝一笑君知否，滿瓮新醅粥面釀。

寄題嚴居厚伴釣軒

人生有至樂，莫若江湖中。
千錢買短舸，青蓑織孤蓬。
潮生鼓棹去，煙波浩無窮。
長歌送夕陽，回首萬事空。
伴釣君已奇，我乃真釣翁。
君出羊裘家，散人亦吾宗。
一見即

定交正以氣味同何時溪莊路共醉蘆花風

溪莊蓋居厚所居

寄趙昌甫并簡徐斯遠

我詩非大手我酒亦小戶得遊名勝間獨以用心苦趙
子乃宿士山立誰敢侮寓名祝融祠蓑笠臥煙雨高吟
三千篇一字無塵土朱先少許可書每說昌甫雖云忍
飢瘦得喪亦相補嗟君與斯遠文中真二虎我老日益
衰想像氣如縷

南園觀梅

幽徑疎籬洗世塵
眼明見此數枝新
橫斜恰受三更月
璀璨先回萬物春
洛浦凌波矜絕態
緱山騎鶴想前身
放翁著句煩君記
畫在生綃却未真

老身

老身無處著
登望憶閒遊
白浪浮天遠
黃雲出塞秋
百年殊鼎鼎
萬事只悠悠
歲晚長亭路
寒侵季子裘

獨處

老夫閉門衰疾嬰
小兒適有南山行
一奴入市莫未返

惜惜不聞鳥雀鳴地爐火死凍脚硬欲作薄粥愁空鎗
平生遣日賴詩句久矣無復吟哦聲但餘一點真正念
照了萬象猶精明欲論此事向何許衆中倘遇千人英
醉中歌

文章日益近衰陋風節久已嗟陵夷元祐大蘇逝不返
慶厯小范今誰知閉門學古人共笑低頭就俗我却疑
脫衣韋可買漁艇爛醉浩歌隨所之

排悶

人間歲月莽悠悠，老大悲傷只涕流。
民饜糟糠寧細事，俗忘節義更深憂。
潦歸宿麥猶難望，雪少同雲未易求。
自歎此生真已矣，且偷暇日弄孤舟。

庚申十二月二十一日西和州健步持子布書報
已取安康襄陽路將至九江矣悲喜交懷作長句
吳蜀相望萬里程，征鞍忽報近湓城。
角巾已入三更夢，老眼先增十倍明。
告至徧為親舊問，勞還淡魄里間情。
追思二紀睽離事，喜極翻成涕泗橫。

又

萬里東來雙鯉魚，衰翁悲喜得兒書。
聞過峴首已冬至，想到匡廬將歲除。
辛苦山行穿雪履，淒涼旅飯嚼冰蔬。
此行身歷艱難遍，莫厭東臯共荷鉏。

園中作

幽禽啼不去，紅藥落還開。
意適時時醉，身閒日日來。
著書增水品，披句覓檀栽。
消息吾兒近，扶衰又上臺。

子布約二

月初到鄉里

足疾

足疾惟妨拜登臨故自如
溪知造物意遣遂此心
初東塢間看竹西溪燭釣魚
莫歸猶未倦把卷遶前除

歲暮書懷

世事從來不可常把茆猶幸得深藏
牀頭酒瓮寒難熟
瓶裏梅花夜更香
薄命元知等蟬翼
畏途何處不羊腸
詩成讀罷仍無用聊滿山家骨董囊

又

憶昔初辭鵷鷺行慨然誓墓老耕桑
蓼汀夜宿夢魂爽
梅塢莫歸襟袖香窮巷每多閒日月
小兒時誦古文章
吾儕窮死從來事敢變胸中百鍊剛

除夜

守歲全家夜不眠杯盤狼藉向燈前
相看更覺光陰速
笑語逡巡即隔年

修路

雨靈道壞困泥塗木石紛然賴里閭
但使僅堪行便足

我無長戟與高車

金丹

予有金丹鍊即成人人各自具長生施行要使俗仁壽
收歛猶能心太平劇飲似鯨身不倦細書如螳眼常明
更餘一事君難學富貴真同涕唾輕

平昔

平昔飄然林下僧更堪衰與病相瘞殘年已任身生死
一念猶關道廢興皎皎初心質天地兢兢晚節蹈淵冰

子孫勿厭藜羹薄此是吾家無盡燈

二月三日春色粲然步至湖上

不媿衰翁雪鬢新出門也復整烏巾梅花隔水香撩客
野鳥穿林語喚人長日難消惟泥酒災年不死又違春
吾兒已到新安未想掬清溪洗客塵

子布度將
至新安

計子布歸程已過新安入畿縣界

憶昔初登下峽船一回望汝一凄然夢魂南北略萬里
人世短長無百年強遣老懷終兀兀忽聞歸騎已翩翩

今朝屈指無窮喜歷盡江山近日邊

東園觀梅

出世仙姝下草堂高標肯學漢宮粧
數苞冷蘂愁渾破一寸殘枝夢亦香
問訊不嫌泥濺屐端相每到月侵廊
高樓吹角成何事只替詩人說斷腸

喜得建茶

玉食何由到草萊重奩初喜坼封開
雪霏庾嶺紅絲磴乳泛閩溪綠地杯
古本常留甘盡日鼻端無復鼾如雷

故應不負明遊意手挈風爐竹下來

春雨

細雨吞平野餘寒勒早春未增豪飲興先著苦吟身幽
徑萱芽短方橋柳色新開門非為老半世是閒人

春雨

擁被聽春雨殘燈一點青吾兒歸漸近何處宿長亭

又

湖上新春柳搖搖欲喚人多情今夜雨先洗馬蹄塵

初春感事

馬跡車聲是處忙，經旬無客到龜堂。
水初泛溢黏天綠，梅欲飄零特地香。
世事紛紛人自老，歲華冉冉日初長。
百錢不辦旗亭醉，空愛鵝兒似酒黃。

又

一樹紅梅已半殘，破裘也復敵春寒。
忍窮過日却差易，負媿終身良獨難。
活火靜看茶鼎熟，清泉自注研池寬。
人生樂處君知否，萬事當從心所安。

道室書事

五十餘年讀道書老來所得定何如目光焰焰夜穿帳
胎髮青青晨映梳

二事皆紀實

甚畏蝮蛇寧斷手已烹熊掌

敢魚魚春蕪二畝扶犁去空憶高皇賜對初

先少師宣和初有贈晁公以道詩云奴愛才如蕭
穎士婢知詩似鄭康成晁公大愛賞今逸全篇偶
讀晁公文集泣而足之

仕不逢時勇退耕閉門自號景迂生遠聞佳士輒心許

老見異書猶眼明
奴愛才如蕭穎士
婢知詩似鄭康成
早孤遇事偏多感
欲續殘章涕已傾

春日雜題

梅花三十本圍以疎竹籬
入春甫十日開遍南北枝
少年輕節物老大復苦衰
坐見零落盡一杯初未持

又

春雨路易乾雨止即可行
梅花落無餘蘭芽亦已生
好鳥何山來向我飛復鳴
行矣東郊路藉草作清明

又

野水如棋枰所至各成村炊煙出茆屋碓聲隔柴門樹
陰同戲兒多已長子孫安居無暴歛何以報國恩

又

春陰不成雨正作卵色天花開路無塵楊柳搖輕煙佳
哉冷淘時槐芽雜豚肩長安隨沙塵況說野狐泉

又

客路行無窮漁唱聽不厭濤江西限吳雲岫南入剡蹇

驢過小市高柳擁孤店去去望前村鴉歸煙欲斂

又

蒲柳深復淡桃李白間紅東皇一稅駕萬物酣春風
煙村在何許小屏團扇中一笑喚稚子相扶上短篷

春日暄甚戲作

桃杏酣酣蜂蝶狂兒童相喚踏春陽老人自笑還多事
預恐明朝雨壞牆

春日

遲日園林嘗煮酒和風庭院曬新絲已過燕子穿簾後
又見鮑魚上市時排悶與兒聯小句破閒留客戰枯棊
殘年自覓安排處除却歸休總不宜

書室獨夜

忽忽新春過惜惜一室幽銅燈立雁趾石鼎揭龍頭老
媿人扶拜貧無食足謀退居消日月大半付莊周

追感往事

太平翁翁十九年

紹興中禁中謂秦
太師為太平翁翁

父子氣焰可熏天

不如茅舍醉村酒日與隣翁相枕眠

又

世事紛紛過眼新九衢依舊漲紅塵
桃花夢破劉郎老燕麥搖風別是春

又

渡江之初不暇給諸老文辭今尚傳
六十年間日衰靡此事安可付之天

又

文章光焰伏不起甚者自謂宗晚唐歐曾不生二蘇死
我欲痛哭天茫茫

又

諸公可歎善謀身誤國當時豈一秦不望夷吾出江左
新亭對泣亦無人

書意

我本三生世外人幻軀其實強冠巾稍能閉戶學種菜
時亦長歌行負薪一醉却非身外事百年終是冢中塵

君知夢境無根底莫信人言想與因

又

病眼猶堪閱世人難將雪鬢著烏巾囊中錢盡罷沽酒
澗底雨寒愁束薪老子那辭徙牛屋癡人自喜拜車塵
窮通要是兒嬉事嬾就山僧講宿因

清都行

有序

辛酉二月十四日夜雞初鳴夢與故人查元章
並轡行大道中前望宮闕甚壯麗元章言吾輩

當同預大議論予與約勿為身謀元章拊掌稱
善遂覺作清都行一首

積雨初收曉寒重野人忽作清都夢宮牆柳色綠如染
仰視修門夜飛動元章久已葬岷山安得翩翩並馳鞚
春光如昔交舊少肺肝欲寫誰堪共頗聞天閭有疑事
通明殿下方僉議約君切勿負初心天上人間均一是
春來食不繼戲作

久卧窮閭困負薪何妨掃盡太倉陳瘦如飯顆吟詩面

飢似柴桑乞食身，犧象未應殊斷木。
江湖底處有窮鱗，大冠長劔人看好。
不換茅簷一幅巾。

紹興辛酉予年十七矣，距今已六十年。
追感舊事，作絕句。

常憶初年十七時，朝朝烏帽出從師。
與許子威輩同從鮑季和先生晨興
必具帽帶而出忽逢寒食停供課，正寫礬書作贗碑。

獨坐視老奴灌園

東窓日晚獨愁予，眼闇年來頗廢書。
賴有吾家老阿對

相從引水灌園蔬

雨晴風日絕佳徒倚門外

一雙芒屨伴筇枝不用兒扶自出嬉貪看南山雲百變
舍西溪上立多時

又

茶釅無端廢午眠杖藜信步到門前青裙溪女結蠶卦
白髮廟巫催社錢

又

章老三年病方死吳翁一夕呼不醒獨有此身頑似鐵

倚門常看算山青

章吳皆隣人
以去冬死

春遊

春風堤上草萋萋草軟沙平護馬蹄似蓋微雲纔障日
如絲小雨不成泥千秋觀裏逢新燕九里山前聽午雞
追憶舊遊愁滿眼絲船曾繫畫橋西

春雨

狼籍殘花滿地紅擁衾孤夢雨聲中人生十事九堪歎

春色三分二已空但有老盆傾濁酒不辭衰鬢對青銅
長貧博得身強健久矣無心咎化工

又

藥爐茶竈淡生涯聽雨猶能惜物華
巖岸頓添三尺水沾泥不貸一城花
間摩病眼開書卷時傍危欄弄釣車
稚子孤行八千里喜聞炊熟可還家

家僮自行在來報
子布寒食前可到

家唐人以寒食
前一日為炊熟

又

自笑平生嬾是真
閉門高枕動兼旬
海棠千片已隨水
杜宇一聲無復春
綠酒盈樽足忘老
朱櫻上市正嘗新
今朝雨止通溪路
又向沙頭岸幅巾

書懷

謝客元無疾
深居似有憂
向空書咄咄
對竹送悠悠
出每思安卧
歸還念遠遊
春衣典已慣
斗酒不難謀

三月十六日至柯橋迎子布東還

江國常年秋雁飛
吾兒遠客寄書稀
道途一見相持泣

隣曲聚觀同載歸
草草杯盤更起舞
匆匆刀尺旋裁衣
從今父子茅簷下
回首人間萬事非

又

我似傷禽帶箭飛
更憐汝作雁行稀
異時恐抱終身恨
此日寧知徒步歸
萬里外應勞遠夢
三年前已挂朝衣
斷編蠹簡相從老
絕念功名亦未非

題施武子所藏楊補之梅

補之寫生梅至簡
亦半樹此幅獨不然
豈畫橫斜句

食野菜

野蔌山蔬次第嘗
超然氣壓大官羊
放翁此意君知否
要配吳粳曉甑香

又

萬里蕭條酒一杯
夢魂猶自度邛笮
可憐龍鶴山中菜
不伴我肴枌朮來

予十許歲即往來雲門諸山
今復與諸子來追念
悽然

經行猶記髣髴初所至
渾如過故墟橋廢夕陽空
鶴表碑亡春草沒龜趺荒
郊渺渺羊牛下叢木蕭蕭
鳥雀呼可恨一衰今至此
右攜筇杖左人扶

雲門道中

度嶺穿林一徑斜旋篝新火
試新茶箬包粉餌祠寒食
雨濕青鞵上若耶石罅微泉
來滴瀝溪涯老木卧槎牙
不須苦覓東柯谷是處雲山
可寄家

龍瑞

多年不蹋陽明路今日重來院院行好在千秋馮觀主
修廊一見眼偏明

禹寺

算春之初光景奇湖平山遠最宜詩尚餘一恨無人會
不見蟬聲滿寺時

寄題張仲欽左司槃澗

劔谿之南有佳處山靈尸之不輕付張公鼻祖晉司空
談笑得地開窓戶谿光如鏡新拂拭白雲青嶂無朝暮

伏几讀書時舉頭萬象爭陳陶謝句公今仙去有嗣子
關塞崎嶇方叱馭山城何曾歎如斗皦皦不受世俗汙
君不見任文往者勢如山朝士幾人無汗顏尊公遺事
不須述但看當時出處間

園中晚興

世故誰能必書生妄自期年光卷中過心事鬢邊知零
落花隨水輪囷筍突籬晚晴山盡出徙倚獨移時

送陳希周赴安福令

補吏鶴嶺邊尊公方玉立超遙籟風雲餘子那可及天
高鬼神惡聞訃三日泣晚途見嗣子握手悲喜集乘桴
掠鯨波信矣勇可習巉巖風骨峭颯霧不能襲謂當上
臺省豈復論等級如何困無津俛首臨一邑顧嗟六朝
民龍鍾垂八十肯來野水濱半月解書笈吾杯僅容餽
安得看鯨吸佇立送歸鞍霽日滿原隰

春晚久雨排悶

積雨暗村墟幽居雜鼃蚓泥潦欲升階几席或生菌壯

年多重脰況我抱宿疾下牀躡高屐顧影輒自哂客來
入我戶亦復為歎憫胡不徙高原再拜謝不敏

甲子日晴

澤國春多雨閏月殊未止皇天俄悔禍果以晴甲子山
川相炳煥桑柘鬱千里壠麥行可穫吳蠶亦三起牀頭
醅瓮香大杓瀉浮蟻醉醒日已晡長歌識吾喜

三月二十日兒輩出謁孤坐北窓

園林春已空陂港雨新足泥深黃犢健桑老紫椹熟豐

年逋負少村社饗酒肉微風吹醉醒起和飯牛曲

又

歲月不相貸布穀忽已鳴新夏亦自佳北窓綠陰成讀

書老易倦披衣繞堦行摩挲枕榔杖與汝樂太平

陳希周自

海外歸送枕榔杖一枝

春盡記可喜數事

微雨洗浮埃蒼顏一笑開僧招行藥圃兒報得琴材病

退初嘗酒春殘已過災隣家賽神會自喜亦能來

卜者謂予

今春當病
幸不甚驗

立夏前二日作

晨起披衣出草堂
軒窗已自喜微涼
餘春只有二三日
爛醉恨無千百場
芳草自隨征路遠
遊絲不及客愁長
殘紅一片無尋處
分付年華與蜜房

老民

乞得不貲身林間號老民
兒因作詩瘦家為買書貧
村僕欺謾少隣翁語笑真
今朝鹽酪盡齋糝更宜人

又

老民無一事終日卧柴扉鑿沼觀魚樂鉤簾待燕歸
架高藤葉密土潤藥苗肥休退真吾分無心學息機

貧甚自勵

忍病停朝藥捐書省夜燈都門下第客山寺退居僧
天每臨幽隱人何與廢興能輕馬千駟肯慕稷三升

衡門

小聚風煙外衡門水竹間疏溝分北澗剪木見南山人

笑謀生拙天教到死間猶存拄杖子遇興即躋攀

遊法雲

放船三家村進棹十字港雲山互吞吐水草遙莽蒼沙
鷗下拍拍野鶩浮兩兩蕭騷菰蒲中小艇時來往匡山
如香爐藍水似車輞夢魂不可到於此寄遐想瘦僧迎
寺門為我掃方丈指似北窓涼此味媿專享我笑謝主
人聊可倚拄杖吾廬已清絕敢取魚熊掌

舟中作

短篷搖櫂算山昏老怯年華易斷魂夾港蒲聲知小雨
隔林績火認孤村奉祠累歲慙家食謝事終身負國恩
惟有愚忠窮未替尚餘一念在元元

貧居

囊空如客路屋窄似僧寮得飯多菰米烹蔬半藥苗草
生初失徑筍放欲干霄不道弓旌誤虞人自畏招

初夏野興

得意煙霞不諱窮一菴聊寄寂寥中山從樹杪參差見

水過花陰曲折通
閒倚胡牀遡新月
時停團扇受微風
元知夢境無真實
不待邯鄲覺後空

又

披衣清曉倚闌干
龜屋裁成二寸冠
盆檜雨餘抽嫩綠
研池風過起微瀾
愛書自笑心常在
去死懸知日尚寬
回視前修似無媿
不教一字入長安

又


扇墮巾欹午夢回
鳴鳩又喚雨絲來
數行褚帖臨窓學

一卷陶詩傍枕開糠火就林煨苦筍密甌沉井漬青梅
艾人行復巍然出老大難堪節物催

劔南詩藁卷四十五

謹案卷四十五第九頁後八行乳泛閩溪綠地杯
刊本杯訛林今改

第十六頁後五行如絲小雨不成泥按唐宋詩醇
小作細



總校官庶吉士臣張能照
校對官庶吉士臣翟槐

謄錄貢生臣王嘉稷